




Općina Stari Grad Sarajevo
Općinski Načelnik

Municipality of Stari Grad Sarajevo
Municipality Mayor

SLUŽBA KABINETA OPĆINSKOG NAČELNIKA

Broj: 01-04-4-2007/22
Sarajevo, 12.08.2022. godine



Grad Sarajevo
GRADSKO VIJEĆE
n/r Jasmin Ademović, predsjedavajući Gradskog vijeća

ul. Hamdije Kreševljakovića 3

Na Vaš broj: 01-GV-04-952-2/22

PREDMET: Nacrt Statuta Grada Sarajeva
Primjedbe, prijedlozi i sugestije, dostavljaju se ...

Poštovani,

Povodom Vašeg dopisa, broj gornji, od 10.06.2022. godine, kojim pozivate općine koje čine Grad Sarajevo za učešće u javnoj raspravi na Nacrt Statuta Grada Sarajeva, razmatrajući navedeni Nacrt, shodno relevantnim odredbama Zakona o principima lokalne samouprave Federacije Bosne i Hercegovine ("Službene novine Federacije BiH", broj: 49/06 i 51/09) i Ustava Kantona Sarajevo, dostavljamo sljedeće primjedbe, prijedloge i sugestije na isti:

U članu 5. stav 1. iza teksta Općine Stari Grad Sarajevo, dodati tekst „...u nadležnostima definisanim ovim Statutom...“

Obrazloženje: Jedinice lokalne samouprave među kojima spadaju i navedene općine (Stari Grad, Centar, Novi Grad, Novo Sarajevo) imaju svoje propisane nadležnosti. Smatramo da je potrebno gore navedeno dodati obzirom da se na taj način razgraničavaju nadležnosti koje Grad Sarajevo ima kao jedinica lokalne samouprave na teritorijama četiri gradske općine koje ulaze u sastav Grad Sarajeva, u odnosu na posebne nadležnosti koje općine kao jedinice lokalne samouprave imaju.

Član 7. (Simboli) propisuje:

„Grad Sarajevo ima grb i zastavu, kao i druge simbole o kojima posebnom odlukom odlučuje Gradsko vijeće.“

Smatramo da prethodno navedena formulacija nije adekvatna Statutu glavnog grada, te da se u samom Statutu mora propisati odnosno opisati izgled grba i zastave Grada Sarajeva, kao i navesti konkretno koje „druge simbole“ Grad Sarajevo ima.

Također, u vezi sa tim, potrebno je propisati i način upotrebe grba i zastave Grada Sarajeva.



Brisati ili izmijeniti član 10.

Obrazloženje: Sjedište Grada Sarajeva kao jedinice lokalne samouprave je promjenjiva kategorija. U slučaju da dođe do potrebe za izmještanjem sjedišta Grada Sarajeva, onda je potrebno mjenjati Statut, što smatramo suvišnim obzirom da je pitanje sjedišta tehničko pitanje, te smatramo da je potrebno isto zaobići prilikom usvajanja Statuta Grada Sarajeva, pri tome ne zanemarujući činjenicu da je članom 97. propisano da je za izmjenu Statuta u pogledu ovog pitanja potrebna dvotrećinska većina od ukupnoga broja gradskih vijećnika, uključujući najmanje po četiri gradska vijećnika iz reda Bošnjaka, Hrvata, Srba i jednoga iz reda Ostalih. Ukoliko predlagač isključivo insistira na ovoj odredbi predlažemo da ona glasi: "Sjedište Grada Sarajeva je u Sarajevu."

U članu 13. stav 2. iza riječi aneksima, dodati „...i ratificiranim konvencijama i drugim međunarodnim aktima koji se tiču zaštite ljudskih prava...”

Obrazloženje: Ustav Bosne i Hercegovine datira iz 1995. godine sa svim svojim aneksima. U odnosu na vremenski period usvajanja ovog Statuta, kao primjer možemo navesti činjenicu da je Bosna i Hercegovine u maju 2007. godine na Generalnoj skupštini UN izabrana za punopravnu članicu UN Vijeća za ljudska prava. U tom pogledu nisu zanemarive odluke i akti koje su od perioda donošenja ustava sa svim svojim aneksima donesene, usvojene i ratificirane do perioda donošenja ovog Statuta. Također nije zanemariv ni postupak procesa pridruživanja Evropskoj uniji i postupak regionalne saradnje. U tom pogledu 2019. godine u Poznanu, usvojena je i Deklaracija partnera Zapadnog Balkana o integraciji Roma/kinja u sklopu procesa proširenja Evropske unije.


U članu član 17. stav 1. i članu 79. stav 2.– riječ isključive nadležnosti zamjeniti sa vlastite nadležnosti, radi usklađivanja terminologije, a u Nacrtu Statuta se osim na ovom mjestu ne spominje isključiva nadležnost. Ukoliko predlagač smatra da Grad kao jedinica lokalne samouprave ima isključivu nadležnost, pored vlastite nadležnosti onda je potrebno definisati istu, ali u skladu sa relevantnim zakonskim i podzakonskim aktima.

Primjedba na Član 18. stav (1) tačka i) Nacrta Statuta Grada Sarajeva: Vlastita nadležnost Grada **ne može biti** „Određivanje imena ulica i trgova na području Grada“ (u konkretnom slučaju radi o vrsti poslova za koje su nadležni i Općina, kao i nadležna komisija Skupštine Kantona Sarajevo).

Također, u Članu 18. stav (1), tačka g) navodi se da je vlastita nadležnost Grada Sarajevo:

Upravljanje, finansiranje i unapređenje djelatnosti i objekata gradske komunalne infrastrukture u skladu sa Ustavom KS, a naročito: gradska groblja, mostovi od posebnog značaja za Grad, ulična gradska rasvjeta i gradski parkovi.

Imajući u vidu da je Općina Stari Grad Sarajevo ulagala značajna sredstva u sanaciju i održavanje javne rasvjete, kao i gradskih parkova u prethodnim godinama, predlažemo da se po usvajanju ovog Statuta zahtijeva od Grada Sarajevo da preuzme svoje obaveze.



U Nacrtu Statuta ne postoje odredbe koje direktno definišu postojanje Šestoaprilske nagrade. Član 31. stav (1) tačka r) propisuje da Gradsko vijeće donosi odluke o nagradama i priznanjima Grada Sarajeva. Imajući u vidu da je Šestoaprilska nagrada najznačajnije priznanje koje dodjeljuje Grad Sarajevo, smatramo da prethodno navedena formulacija nije adekvatna za Statut Grada Sarajeva, te da je potrebno posebno definisati postojanje navedene nagrade kao i eventualno druga pitanja od značaja za dodjelu iste.

U članu 33. stav (1) Nacrta Statuta Grada Sarajeva, izvršena je izmjena u broju zamjenika predsjedavajućeg Gradskog vijeća, te je umjesto dosadašnjeg regulisanja izbora 2 zamjenika predsjedavajućeg, propisan izbor **3 zamjenika predsjedavajućeg Gradskog vijeća Grada Sarajeva**, a za koju promjenu nije vidljiv pravni osnov.

U članu 43. Nacrta Statuta Grada Sarajeva, propisan je **Izbor i smjena Gradonačelnika**, te su istom članu izvršene znatne izmjene, bez navedenog pravnog osnova.

Članove 61. i 66. Nacrta Statuta bi trebalo dopuniti/precizirati na način da organizovanje/sazivanje mjesnih zborova građana „**mora biti u saradnji sa Općinom na čijoj teritoriji se nalazi mjesna zajednica/e u kojima se organizuje zbor građana**“.

Član 76. stav (1) propisuje: „*Imovinu Grada Sarajeva čine pokretna i nepokretna imovina, a imovinom se smatraju stvari, prava i novčana sredstva stečena raspodjelom imovine između Kantona Sarajevo, Grada Sarajeva i gradskih općina na način koji omogućuje Gradu Sarajevu obavljanje njegovih nadležnosti, kupovinom ili na drugi način, u skladu sa zakonom.*“

Smatramo da dio navedene odredbe i to riječi „*na način koji omogućuje Gradu Sarajevu obavljanje njegovih nadležnosti*“ treba izbrisati, zbog toga što prethodni dio nakon navedenih riječi jasno definiše šta se smatra imovinom i da je ta imovina do ovoga momenta stečena raspodjelom između Kantona Sarajevo, Grada Sarajeva i gradskih općina, te da je to imovina stečena kupovinom ili na drugi način, u skladu sa zakonom.

Brisati član 99.

Obrazloženje: Grad kao jedinica lokalne samouprave ravnopravan je sa općinom kao jedinicom lokalne samouprave. Smatramo da je ovaj član potrebno brisati iz razloga što je općina kao jedinica lokalne samouprave dužna uskladiti svoje pravne akte sa Ustavom kao najvišim pravnim aktom u Bosni i Hercegovini, Federaciji Bosne i Hercegovine i Kantonu Sarajevo, te zakonima i podzakonskim aktima koje donose Bosna i Hercegovine, Federacija Bosne i Hercegovine i Kanton Sarajevo. Činjenica je da Grad Sarajevo čine četiri gradske općine, ali jednako tako treba napomenuti da je općina kao jedinica lokalne samouprave samostalna, te da se njeni pravni akti usklađuju sa višim pravnim aktima, a ni u kojem slučaju sa aktima jednakog nivoa. U tom pogledu smatramo i da je presudno donošenje Zakona o lokalnoj samoupravi Kantona Sarajevo, čime bi ovo pitanje bilo jasno definisano, a što je ujedno i obaveza propisana u Zakona o principa lokalne samouprave u FBiH, ali i međunarodno priznati prava na lokalnu samoupravu među kojima izdvajamo i Evropsku povelju o lokalnoj samoupravi, a što je između ostalog u dostavljenom obrazloženju Nacrta Statuta Grada Sarajeva i navedeno.

U članu 100. se nalazi tehnička greška odnosno potrebno je izbrisati navodne znake na početku i kraju rečenice odnosno stava.

Nadalje, članom 101. Nacrta Statuta Grada Sarajeva propisana je objava i stupanje na snagu Statuta, u kojoj su napravljeni izuzeci od stupanja na snagu odredaba člana 33. stav (1) i člana 44. stav (2), koje stupaju na snagu nakon Lokalnih izbora Bosne i Hercegovine, a što nije u skladu sa odredbama člana 21. stav (4) i (5) Pravila i postupaka za izradu zakona i drugih propisa Federacije BiH ("Službene novine Federacije BiH", broj 71/14), a kojima se članom 1. stav (2) preporučuje nosiocima normativnih poslova u kantonima, općinama i gradovima da primjenjuju pravila za izradu propisa.

S obzirom na čestu pojavu upotrebe službenih naziva organa uprave, a u ovom slučaju „Grad Sarajevo“ u nazivima određenih pravnih lica, smatramo da bi poželjno bilo u Statutu propisati odredbu koja će predstavljati osnov za korištenje navedenog naziva.

U vezi sa prethodno navedenim, odredba bi mogla da ima sljedeću formulaciju:

„Član X.

Naziv „Grad Sarajevo“ može se upotrebljavati u nazivima pravnih lica u skladu sa odlukom koju donosi Gradsko vijeće.“

U Nacrtu Statuta je izostavljen član Statuta koji bi regulisao „ **Zajedničko obavljanje nadležnosti i poslova Grada Sarajeva i Općina u sastavu Grada**“ (predlažemo razmatranje).

U Nacrtu Statuta ne postoje odredbe koje definišu postojanje „počasnog građanina Grada Sarajeva“ odnosno odredbe koje propisuju ko odlučuje o proglašenju počasnog građanina Grada Sarajeva. Kako je ovo značajno pitanje za jedan grad, a naročito glavni grad države, smatramo da Statut glavnog grada mora da sadrži navedene odredbe.

Zasnovanost akta na zakonu potvrđuje:

Hamida Gušić, Rukovodilac Službe kabineta Općinskog načelnika, po ovlaštenju

Dostaviti:

1. Naslovu
2. Sekretar organa državne službe
3. Evidencija





Grad Sarajevo
City of Sarajevo

Sarajevo, 29.08.2022. godine
Broj: 01-08-Gp-78/22

GRAD SARAJEVO
GRADSKO VIJEĆE

Hamdije Kreševljakovića br. 3
71000 Sarajevo

Bosna i Hercegovina
Federacija Bosne i Hercegovine
Kanton Sarajevo
Grad Sarajevo

PRAVOBRANILAŠTVO

Bosna i Hercegovina - Federacija Bosne i Hercegovine
Kanton Sarajevo - GRAD SARAJEVO
GRADSKO VIJEĆE

PRIMLJENO: 30 AUG 2022			
Org. jed.	Broj	Prilog	Vrijednost
01-GV-04	1303	22	

PREDMET: Sugestije i prijedlozi na Nacrt Statuta Grada Sarajeva

Poštovani gospodine Ademović,

Gradsko vijeće Grada Sarajeva na 16. sjednici održanoj dana 01.06.2022. godine donijelo je Zaključak broj 01-GV-02-952/22 kojim je utvrđen tekst Nacrta Statuta Grada Sarajeva, te isti je upućen u javnu raspravu u trajanju do 01.09.2022. godine.

Sukladno pozivu za učešće u pomenutoj javnoj raspravi, Pravobranilaštvo Grada Sarajeva daje slijedeće sugestije i prijedloge u pogledu teksta Nacrta Statuta Grada Sarajeva.

1) U uvodu Nacrta Statuta Grada Sarajeva kao pravni osnov za donošenje Statuta se navode Amandmani na Ustav Federacije BiH, te odredbe Zakona o principima lokalne samouprave u Federaciji BiH.

Smatramo da je neophodno kao pravni osnov za donošenje Statuta Grada Sarajeva navesti Ustav Kantona Sarajevo Amandman I na član 4. Ustava Kantona Sarajevo („Sl. novine Kantona Sarajevo“, broj 16/97) kojim je Grad Sarajevo u sadašnjem obliku i uveden kao nova jedinica lokalne samouprave u Kantonu Sarajevo.

2) Odredbe člana 8. stav 2. Nacrta Statuta Grada Sarajeva propisuju da „Sadržaj pečata je sljedeći: „Bosna i Hercegovina – Federacija Bosne i Hercegovine“ u prvom koncentričnom krugu, „Kanton Sarajevo – GRAD SARAJEVO“ u drugom koncentričnom krugu i naziv organa u trećem koncentričnom krugu“.

Budući da se administracije Gradske uprave Grada Sarajeva sastoji od gradskih službi, to predlažemo da je u članu 8. stav 2. iza riječi naziv organa potrebno dodati riječi „ili službe“.

3) U odredbama člana 16. stav 2. tačka a) Nacrta Statuta Grada Sarajeva navedeno je „...i dokumente tajnog karaktera...“.

Adresa: Hamdije Kreševljakovića 3
71000 Sarajevo, BiH
Tel: +387 33 206 440
Fax: +387 33 206 440
Email: pravobranilastvo@sarajevo.ba
Web: www.sarajevo.ba





Ističemo da gradskim propisima trenutno nije definisano da bilo koji dokument ima tajni karakter, stoga trebalo bi gradskim propisom definisati koji su akti tajnog karaktera, koji mogu dobiti takvu oznaku, kako se i ko sa njim može postupati.

Dosadašnja praksa i rad nisu pokazali da postoje akti kojim bi se dala takva kvalifikacija, uz uvažavanje da svaki državni službenik i namještenik shodno propisima i radnoj obavezi mora da postupa sa dužnom pažnjom i profesionalno prema predmetima i aktima u radu.

Stoga sugestija se da se predmetna odredba uskladi sa važećim propisima.

4) U odredbama člana 18. stav 1. tačka d. se navodi „*utvrđivanje i provođenje politike planiranja i uređenja prostora...*“.

U odredbama Zakona o prostornom uređenju KS navodi i koristi se termin *urbano planiranje*, stoga je sugestija da se u predmetnoj odredbi koristi pravilna terminologija sukladno odredbama Zakona o prostornom uređenju.

5) Odredbe člana 18. stav 1. tačka e. Nacrta Statuta Grada Sarajeva propisuju kao nadležnost Grada Sarajeva, „*utvrđivanje politike korištenja i utvrđivanje visine naknade za korištenja javnih dobara*“.

Ističemo da odredbe člana 7. stav 1. Zakona o stvarnim pravima F BiH propisuju da „*Nisu sposobni biti objektom prava vlasništva i drugih stvarnih prava oni dijelovi prirode koji po svojim osobinama ne mogu biti u vlasti niti jedne fizičke ili pravne osobe pojedinačno, nego su na upotrebi svih, kao što su to atmosferski zrak, voda u rijekama, jezerima i moru, te morska obala (opća dobra)*“, dok odredbe stava 2. istog člana propisuju da „*Javna dobra su stvari koje su po zakonu namijenjene da služe svima pod jednakim uvjetima, kao što su: javni putevi, ulice, trgovi i sl. Na javna dobra se primjenjuju pravila koja važe za opće dobra, ako zakonom nije šta drugo određeno*“.

Obzirom na navedene odredbe Zakona o stvarnim pravima jasno je određeno šta su javna dobra i eksplicitno je propisano da ista nisu sposobna biti objektom prava vlasništva i drugih stvarnih prava, te da su ista namjenjena da služe svima pod jednakim uvjetima.

Ukoliko se Grad odluči da vodi brigu, upravlja i odgovora za određeno javno dobro, to ne podrazumjeva da ima zakonsku mogućnost da utvrđuje visinu naknade za korištenje, kao i da vrši naplatu iste.

6) Odredbe člana 18. stav 1. tačka h. Nacrta Statuta Grada Sarajeva propisuju kao nadležnost Grada Sarajeva „*...propisivanje pravila održavanja reda u stambenim zgradama na području Grada Sarajevo...*“.

Stupanjem na snagu Zakona o stvarnim pravima F BiH u toku 2013. godine u pogledu ove oblasti je propisano da etažni vlasnici sami odlučuju i ugovorom regulišu predmetnu problematiku, dok je odredbama Zakona o zajedničkim dijelovima zgrade propisano da navedene poslove obavlja upravnik kao pravno ili fizičko lice-obrtnik registrovano kod nadležnog organa uprave za obavljanje djelatnosti upravljanja nekretninama uz naknadu ili na osnovu ugovora i pomoćne djelatnosti upravljanja zgradama, koji upravlja zajedničkim dijelovima zgrade, vrši održavanje istih i obavlja druge poslove koje mu povjere etažni vlasnici.

Napominjemo da tokom 2019. godine Gradsko vijeće Grada Sarajeva je imalo u razmatranju prijedlog Odluke o stavljanju van snage Odluke o kućnom redu u stambenim zgradama, iako je ista u konačnici



nije bila predmet odlučivanja Gradskog vijeća, iz obrazloženja navedenog prijedloga odluke se mogu vidjeti svi razlozi i osnov zašto ovo više ne može biti nadležnost Grada Sarajeva, te upućujemo na sadržaj tog teksta.

7) U članu 18. stav 1. tačka q. Nacrta Statuta Grada Sarajeva predlažemo da se slovo „q“ izostavi te da se koriste slova iz abecede i pravopisa službenih jezika i pisama u BiH, a kako je to i navedeno u odredbama člana 11. Nacrta Statuta Grada Sarajeva koje propisuju da „*Bosanski, hrvatski i srpski jezik te ćirilično i latinično pismo su u službenoj upotrebi u skladu sa Ustavom*“.

Nadalje, u istoj tački predlažemo brisanje teksta „*raspisivanje samodoprinos*“ obzirom da se pravni osnov za isto ne može pronaći niti u jednom pozitivnom propisu, te isto predstavlja tekovinu bivšeg sistema.

8) Član 31. Nacrta Statuta propisuje nadležnosti Gradskog vijeća Grada Sarajeva. U članu 31. primjedba se odnosi na nepostojanje stava 2., a navodi se tekst stava 3. istog člana. S tim u vezi predlažemo korekciju.

Nadalje ističemo da je odredbama člana 45. Zakona o pravobranilaštvu Kantona Sarajevo propisano da „*Gradskog, odnosno općinskog pravobranioca i njegovog zamjenika imenuje i smjenjuje Gradsko, odnosno općinsko vijeće, na prijedlog gradonačelnika, odnosno općinskog načelnika*“.

Identične su i odredbe člana 16. Odluke o osnivanju Pravobranilaštva Grada Sarajeva.

Stoga predlažemo da se kao nadležnost Gradskog vijeća propisana Statutom Grada Sarajeva uvrsti i „*donošenje odluke o imenovanju i smenjivanju pravobranioca i zamjenika pravobranioca, na prijedlog gradonačelnika*“.

9) Primjedbe na odredbe člana 31. stav 1. tačka i., tačka n. Nacrta Statuta Grada Sarajeva su iste kao i primjedbe iznesene kao pod tačkom 5. (javna dobra) i 7. (samodoprinosi).

10) Odredbe člana 31. stav 3. Nacrta Statuta Grada Sarajeva propisuju nadzor organa uprave Grada Sarajeva od strane Gradskog vijeća.

Primjedba se odnosi na činjenicu da predmetnim odredbama nije definisano i predviđeno šta se dalje dešava sa izvještajem koji se podnosi Gradskom vijeću i kome se isti dalje prosljeđuje na nadležno postupanje.

11) Odredbe člana 41. stav 2. Nacrta Statuta Grada Sarajeva propisuju da „*Gradonačelnik predstavlja Grad Sarajevo u skladu sa ovim Statutom i zakonom*“.

Odredbe člana 38. trenutno važećeg Statuta Grada Sarajeva propisuju da „*Gradonačelnik predstavlja i zastupa Grad Sarajevo*“.

Smatramo da je odredba trenutno važećeg Statuta ispravna budući da se u istom navodi da gradonačelnik predstavlja i zastupa Grad Sarajevo, dok odredbe Nacrta Statuta propisuju da gradonačelnik predstavlja Grad Sarajevo.



Ističemo da predstavljanje i zastupanje nisu sinonimi.

Funkcija zastupanja Grada Sarajeva lica sastoji se u obavljanju pravnih radnji u ime i za račun Grada Sarajeva kao pravnog lica u prometu sa trećim licima, ili u postupcima pred sudovima, upravnim i drugim organima.

Funkcija predstavljanja Grada Sarajeva podrazumjeva istupanje u ime Grada Sarajeva kao pravnog lica u raznim protokolarnim susretima, konferencijama i sličino, ili sa trećim licima, ali bez stvaranja obaveza po Grad Sarajevo.

Stoga osnovna razlika između predstavljanja i zastupanja je u tome što zastupnik stupa u poslovne odnose u ime zastupanog, u konkretnom slučaju Gradonačelnik u ime Grada Sarajeva stiče i preuzima prava i obaveze, odnosno pravni poslovi koji su zaključeni ili učinjene pravne radnje imaju neka neposredna dejstva za pravno lice, konkretno Grad Sarajevo.

Predstavnik ne stupa u pravne odnose sa trećim licima, odnosno ne može zaključivati i preuzimati bilo kakve pravne radnje u ime Grada Sarajeva niti sticati i preuzimati prava i obaveze.

Naglašavamo da je zastupnik pravnog lica istovremeno i predstavnik istog, dok predstavnik nije nužno i zastupnik pravnog lica.

Obzirom na navedeno sugerišemo da se zadrži odredba trenutno vazećeg Statuta koja propisuje da "Gradonačelnik predstavlja i zastupa Grad Sarajevo...".

12) U pogledu odredbi člana 49. stav 1. Nacrta Statuta Grada Sarajeva predlažemo da se razmotri mogućnost da Kolegij Gradonačelnika čini i Pravobranilac Grada Sarajeva.

13) Odredbama člana 79. stav 3. Nacrta Statuta Grada Sarajeva propisuju da se pojedini akti i propisi Gradonačelnika objavljuju u Službenim novinama Kantona Sarajevo, a pojedini u Službenim novinama Federacije BiH.

Smatramo da je sasvim utemeljeno i dovoljno zadržati dosadašnju praksu objave propisa i akata u Službenim novinama Kantona Sarajevo.

Predloženo pravno rješenje je u suprotnosti sa pravilima pravne nauke nomotehnike, Pravila i postupaka za izradu zakona i drugih propisa Federacije BiH, kao i ostalih propisa sa sličnom tematikom.

Nadalje, osnovano se nameće pitanje šta ako akti određeni akti budu doneseni na osnovu Zakona Bosne i Hercegovine.

Smatramo da bi predloženo rješenje bilo zbunjujuće i nesvrishodno, te sugerišemo da se zadrži dosadašnja praksa objave propisa i akata u Službenim novinama Kantona Sarajevo.

14) Odredbe člana 86. Nacrta Statuta Grada Sarajeva propisuju da "*Organi Grada Sarajeva su odgovorni za prioritetnu i potpunu provedbu privremenih mjera i sudskih odluka, koje sud donese u okviru svoje nadležnosti u vezi sa nadzorom nad radom organa Grada Sarajeva*".

Ističemo da nadležnost suda nije obavljanje nadzora nad radom bilo kojeg organa uprave niti drugih pravnih i fizičkih lica, već sudovi obavljaju isključivo posao sudske vlasti kao jedan segmenata horizontalne podjele vlasti na zakonodavnu, izvršnu i sudsku vlast. Posao sudske vlasti jeste da interpretira zakone koje je donijela zakonodavna vlast putem sudova koji tumače zakone u sporovima između pojedinaca, odnosno fizičkih i pravnih lica, kao i u sporovima između istih sa upravnim



organima, ili u sporovima između upravnih organa međusobno.

Zakonom o sudovima Federacije Bosne i Hercegovine ("Službene novine F BiH br. 38/05, 22/06, 63/10, 72/10, 7/13, 52/14 i 85/21) uređuje se organizacija, nadležnost, finansiranje, pravosudna uprava i druga pitanja od značaja za organizaciju i funkcioniranje općinskih sudova, kantonalnih sudova i Vrhovnog suda Federacije Bosne i Hercegovine. Istim Zakonom je propisano da "Sudovi vrše sudsku vlast u Federaciji Bosne i Hercegovine", zatim da "Sudovi štite prava i slobode zagaranitirane ustavima Bosne i Hercegovine, Federacije i kantona i zakonom, te osiguravaju ustavnost i zakonitost", te da "Sudovi u svom radu postupaju nepristrasno, blagovremeno i efikasno", kao i da "Odluke svih sudova u Bosni i Hercegovini obavezujuće su na teritoriji Federacije".

Obzirom da sudovi ne vrše nadzor nad radom organa uprave, to sugerišemo da se sukladno navedenom predmetna odredba uskladi zakonom definisanoj funkciji sudova.

Također ističemo da je privremena mjera također sudska odluka, stoga je nepotrebno istu posebno izdvajati.

U pogledu predmetne odredbe predlažemo formulaciju "Organi Grada Sarajevo su odgovorni za prioritnu i potpunu provedbu sudskih odluka koje sudovi donesu postupajući u okviru svojih nadležnosti odlučujući o pravima i obavezama Grada Sarajevo."

15) Odredbama člana 101. Nacrta Statuta Grada Sarajeva je predviđena paralelna objava u Službenim novinama Kantona Sarajevo, Službenim novinama Federacije BiH i Službenom glasniku BiH, dok je stupanje na snagu određeno od objave u Službenim novinama Kantona Sarajevo.

Iskustvo i praksa pokazuju da različiti datumi objavljivanja u više službenih glasila dovode do ozbiljnih problema pri utvrđivanju datuma stupanja na snagu.

Kao i do sada treba zadržati praksu da Statut biva objavljen u Službenim novinama Kantona Sarajevo i da stupa na snagu osam dana od dana objave u tim službenim novinama, a kako je prethodno obrazloženo pod tačkom 13).

Nadalje, nomotehnički je pogrešno da samo pojedine odredbe nekog člana stupaju naknadno, kao i da njihovo stupanje na snagu jeste apsolutno vremenski neodređeno i neizvjesno, a formulacija iz predmetne odredbe "nakon Lokalnih izbora u Bosni i Hercegovini 2024. godine" je upravo takva.

U pravnoj nauci nomotehnici sugeriše se da se uvijek veže za određeni dan ili datum, tako da ukoliko se Gradsko vijeće odluči da zadrži rješenje o naknadnom stupanju na snagu samo pojedinih odredbi, onda sugerišimo da predmetna odredba glasi "izuzev odredbe iz člana 33. stav (1) i (3) i član 44. stav (2) koje stupaju na snagu danom potvrđivanja rezultata Lokalnih izbora 2024. godine od strane Centralne izborne komisije".

S poštovanjem,

DOSTAVITI:

1. Naslovu,
2. U spis.



Hava Pandžić

Pošiljatelj: Adi Škaljić <skaljic1987@gmail.com>
Poslano: srijeda, 31. august 2022. 11:25
Prima: Gradsko Vijeće Sarajevo - pisarnica
Predmet: Klub NS - Prijedlozi na Nacrt Statuta Grada Sarajeva
Privici: Klub NS - Prijedlozi na Nacrt Statuta Grada Sarajeva.pdf

PRIMLJENO:		31 AUG 2022	
Org. jed.	Broj	Prilog	Vrijednost
01-GV-04	1309		22

Poštovani,

U prilogu su prijedlozi Kluba NS na Nacrt Statuta.

Prosljediti predlagачu, Komisija za Statut i akte Gradskog vijeća i obrađivaču, Stručna služba za poslove Gradskog vijeća.

Srdačan pozdrav

Adi Škaljić, predsjednik kluba

Klub vijećnika_ca Naše stranke u Gradskom vijeću Grada Sarajeva
Sarajevo, 31.8.2022.

BOSNA I HERCEGOVINA
FEDERACIJA BOSNE I HERCEGOVINE
KANTONA SARAJEVO
GRAD SARAJEVO
Gradsko vijeće Grada Sarajeva
n/r predsjedavajući, Jasmin Ademović

Dostaviti:
predlagaču, Komisija za Statut i akte Gradskog vijeća
obrađivaču, Stručna služba za poslove Gradskog vijeća

PREDMET: PRIJEDLOZI NA NACRT STATUTA GRADA SARAJEVA

Poštovani,

Na člana 114. Poslovnika Gradskog vijeća Grada Sarajeva, u toku javne rasprave za gore navedeni akt, dostavljamo sljedeće prijedloge:

PRIJEDLOG 1.

U Članu 28. stav (6) mijenja se i glasi:

Izbori u općinskom vijeću za Gradsko vijeće su javni i vrše se dizanjem ruke, glasačkog kartona ili upotrebom elektronskog sistema.

PRIJEDLOG 2.

U članu 33. stav (7) mijenja se i glasi:

Predsjedavajući i zamjenici predsjedavajućeg mogu biti i ranije razriješeni većinom glasova izabranih gradskih vijećnika, nakon čega se biraju novi predsjedavajući, odnosno zamjenici predsjedavajućeg.

PRIJEDLOG 3.

Član 67. stav (2) mijenja se i glasi:

Za pokretanje građanske inicijative potrebno je osigurati 3% potpisa građana, koji su upisani u biračke spiskove na području Grada Sarajeva.

PRIJEDLOG 4.

U članu 77. stav (1) mijenja se i glasi:

Gradsko vijeće donosi: Statut Grada Sarajeva, Poslovnik Gradskog vijeća, Etički kodeks Gradskog vijeća, godišnji program rada Gradskog vijeća i Budžet, platformu, strategiju, planski akt, program, preporuku, smjernicu, deklaraciju, rezoluciju i izjavu, odluku, izvještaj, informaciju i zaključak (u daljnjem tekstu: akt) i druge akte iz nadležnosti Gradskog vijeća Grada Sarajeva, u skladu sa zakonom.

Klub vijećnika_ca NS



Predsjednik kluba, Adi Škaljić